

# Tiende Grunneger kulturele manifestoatsie

**WINSCHOTEN** - Op 25, 26 en 27 september wordt veur de tiende moal de Grunneger kulturele manifestoatsie 'Van Ledderom' holden. De eerste twij doage in cultureel centrum De Klinker in Winschoten. Op 27 september is de Liudgerdag in Stadsparkkerk in Groningen.

In De Klinker wordt vrijdag 25 september n Literaire Oavend holden, dij presenteerd worden zel deur Wia Buze. Bert Huizenga zel de Grunneger schrievers Haarm Diek, Jan Iden, Roely Meijer en Henri Wierth ondervoagen over heur schrieverij. Aal vaaijer zellen ze ook wat oet aigen waark veurlezen.

Rika Dijkstra zel Grunneger teksten zingen, begelaaid deur Wouter de Koning op de piano. Wieder komt de Winschoter zanger Jan Klönne. Hai begelaaidt zuk zulf op gitaar. Op dizze oavend worden ook de prieswinnoars bekendmoakt van de wedstried in t schrieven van kinderverhoalen, dij t Grunneger Bouk holden het. Juryveurzitter Greetje Marquering zel oetslag bekend moaken. Veurof en in de pauze kin der in De Boekenkist snuusterd en kocht worden. t Ommelander Antiquariaat en oetgeverij Tellerlikker binnen ook present. De oavend begunt om 20.00 uur. Tougang is 7,50 gulden. Zotterdag 26 september is d'r van 17.00 tot 20.00 uur n Snuustermid-

dag in De Klinker. De Boukenkist is open veur de laifhebbbers van Grunneger bouken en muziek. Tougang is vergees.

Om 20.00 uur begunt de Grunneger Oavend. t Grunneger Volkstoneel zörgt mit n mooie ainakter 'Verzide' veur t onderdail toneel. t Is n Grunneger bewaarken deur Aaldrik Hovius van t stuk 'Visite' van Hugo Claus over André Daniëls, dij onverwachts n man over t mat krigt dij proaten wil over n gezoamelke kennis van vrouger. Aal gaauw is dudelk dat de man nait alleneg veur n kletproatje komt, moar dat n gebeurtenis oet t verleden hom nogal bezeg holdt.

Veur de pauze ingt Wia Buze drij nije laidjes op t thema 'Dörp en Stad'. Op t zulfde thema zel Kees Visscher op de van hom bekende menaaijer n verhoal veurlezen. Ook wordt de K. ter Laan-Pries 1997 oetlangt aan Cees Reinders van Middelsoom.

De meziek wordt dizze oavend verzörgd deur t Van Ledderom Combo en de Knoalster zanger/tekstschriever Eltje Doddema. Annet Westerdijk zel oavend aan mekoar proaten. In de pauze binnen de stands van De Boukenkist, oetgeverij Tellerlikker en t Ommelander Antiquariaat open. Tougang veur de Grunneger Oavend is 15 gulden. Veur doanateurs is t 7,50 gulden.